



Enteifer rodond mes'ura vegn mintgamai in'entira petga montada provisoricamein.



La montascha dallas petgas dalla sutgera Mulinatsch dallas Pendericas Sedrun SA succeda cun in helicopter d'aula prestaziun.

FOTOS MAD

10 kilometers dapli pistas per Sedrun

Las petgas per la sutgera da Mulinatsch dallas Pendericas Sedrun SA ein montadas

■ (sb) La damaun dil mardis vargau vesev'ins strusch enzatgei dalla sutgera nova dallas Pendericas Sedrun. Tschun uras pli tard fuva il helicopter dalla Heliswiss gia sgulaua 44 ga da Dieni a cuolm e las 15 petgas per la sutgera nova stevan en retscha. Il menader tecnic dallas Pendericas Sedrun SA, Sep Hendry, ei fetg cuntents cu'g andament dallas lavurs e ch'ei ha dau negins accidents. Las lavurs han entschiet avon strusch dus meins cun far ils fundaments, la staziun a val e lavurs d'electricitad. Las fatschentas da baghegiar indigenas Loretz e Murer han profitau dalla bialaura aschia che tut fuva semtgau ad uras. Il mardis vargau ei stau in impurtont di da montascha nua ch'ins ha viu bein il resultat la sera. La damaun stevan sulet las empremas quater petgas agrads. Ellas ein vegnidas montadas il gliendis cun agid d'in auto cun crana. Ils

montaders dalla firma Inauen-Schätti da Glaruna ed il pilot Rolf Thoman dalla Heliswiss han prestau lavur da precisuon. Il schef montader da quella lavur, Gian Carlo Hendry, deriva da Sedrun. Per el eis ei in eveniment special da luvrar en sia patria. Avon duas jarnas han ils montaders entschiet a semtgau igl uorden sil parcadi a Dieni. Cu il helicopter Kamov, in gigant cun dus roturs sin in ischel, ei staus el liug, ha tut stuu ir spert. Ils cuosts da transport ein numnadamein carischia e mintga minuta quenta. La montascha dallas petgas pretenda perseveranza e quita da mintgin. «Jeu astgel buca far sbagls e sto'esser immens concentraus e precis, in pign sbagl savess caschunar in tragic accident», ha il pilot Thoman descret sia lavur.

In crap giu dil cor

Observond ils sgols ella vischinonza

d'ina petga vegn ins pertscharts sut tgei cundiziuns ch'is montaders prestan lavur da precisuon. Fertun ch'igl aspectatur sa strusch fitgar pei el plaun sesanflan ils umens silla petga ni silla cruna da quella e fan ina pareta segira. Gian Carlo Hendry ha descret il sentiment ell'altezia: «Igl ei ina mischeida da battacor, respect ed in tec tema, mo il placher dalla lavur surpren.» L'emprema ga ch'el hagi fatg ina tala lavur hagi el tertgau ch'el suffli naven, mo cul temps senti ins buca pli il vent. Ils umens ch'ei segirai cun ina suga drovan omisus mauns per luvrar e san buca setener. Sch'il helicopter vess da seglir en cun in toc san els buca nua scappar. Perquei ha il giuven montader in crap ch'ei daus giu dil cor cu ils transports ein stai terminai. Suentar biebeen sis uras e 44 sgols stevan tuttas 15 petgas en retscha. Ussa ha ei giu num sgular ulteriuras 20 ga e transportar il mate-

rial per la staziun sil cuolm. Gian Carlo Hendry e sia gruppa vegnan aunc ad esser occupai dus entochen treis meins a Sedrun. Ina squadra montescha la staziun sil cuolm. L'otra va d'ina petga a l'otra, strubegia en tuttas strubas, fixescha e drezza tut exactamein en lingia. En in meins duei la suga che peisa 40 tonnas vegnir montada.

Pli gronda sutgera dil 2006 en Svizra

La sutgera Mulinatsch ei la pli gronda sutgera che vegn baghegiada uonn en Svizra. Ella ha ina capacitad da menar 2900 persunas per ura da Mulinatsch a Cuolm Val. Vid la suga vegnan 120 suppias da 6 persunas a pender. La sutgera che cuosta rodund 10,4 milliuns francs remplazza ils runals schumellins da Milez. Quels runals ein gia vegni spazzai. Tut ils auters runals duein restar en funcziun. La staziun a val ei plirs 100 meters pli a bass (altezia da Planatsch)

che quella a Milez. La sutgera da 2124 meters lunghezia sesanfla biebeen 150 meters dretg dils runals schumellins. In viadi culla sutgera cuoza siat minutas e mesa. Quei munta in grond augment da capacitad. «Enstagl da 40 kilometers pista savein nus ussa far rodund 50 kilometers», declara Sep Hendry. Fetg impurtont seigi denton che las Pendericas Sedrun SA ein ella confortabla staziun da saver ennevar gl'entir territori da Dieni a Milez, Cuolm Val e Val Val entochen Calmut/Tiarms. Ei ha era avunda aua avon maun. Quella vegn tschafada dils flums Val Val e Val Giuf. Il cundrez d'ennevar il territori dalla sutgera nova ei vegnius contruiss igl onn vargau. «Sper las pistas vegnan uss era ils amatur da freeride' a vegnir aunc meglier sin lur quen», ha Hendry fatg da saver. Ils otg da december duein las lavurs esser terminadas e la sutgera nova vegnir en funcziun.

Luvrau dabia sin incumbensa

La Scuntrada e formaziun Surselva ha tratg bilanza e presentau il program da 2006/2007

■ (sib) Sepsiziun da niev cun in'otra purschida ei stau la finamira principala dalla Scuntrada e formaziun Surselva (SFS) igl onn 2005/06. Quella nova purschida cumpeggia oravontut la lavur per incumbensa che la SFS ha prestau igl onn vargau per differentas instituziuns. Quei niev sistem d'offerir per

exempel cuors da lungatg ni dis da formaziun ad instituziuns sco il RAV, l'EMS Chemia ni la Kiga entscheiva tenor il gestinari Martin Mathiuet a purtar fretg. Leutier s'audan era cuors per commembers da cussegls da scola che la SFS realisescha per incumbensa dalla Associazion dils cussegls da scola dil Gri-

schun. Grazia a quella nova strategia ha la SFS schizun saviu scaffir ina piazza parziala nova ella regiun per in scolast da lungatgs. Ensemen cun ils cuors tradiziunals ha la SFS saviu contonscher aschia in total da participonts da 2184 persunas. Quei ei biebeen ton sco el temps da fluriziun dils cuors dalla SFS ils onns orgonta. In accent special ha il cuors da PC per temelets e fuffergnaders a Mustér dau. Quel ha la firma Microsoft pagau dil tutfatg, aschia ch'el ei staus gratuits pil participonts. Cunquei che quell'acziun hagi svegliu irritaziuns e critica tier la concorrenza desistien els denton d'ina cuntinuaziun, ha Martin Mathiuet remarcau. Sil sectur dils affons e giuvenils han ins slargiau la purschida cun preparaziuns per examens da recepziun.

Agid da muntogna sustegn scolaziun

Il punct culminont digl onn da quen ei stau la festa pil giubileum da 20 onns SFS. Quella ha giu liug cun dabia prominenz ed il sustegn da plirs partenaris e sponsurs, aschia era digl Agid da muntogna svizzer. Igl impuls che quella organisaziun hagi retschert da quei engaschament hagi schizun menau ad ina mi-

dada da strategia, di Martin Mathiuet: «La direziun digl Agid da muntogna svizzer ei pertscharta ch'il puresser sa surviver ellas Alps sch'ei dat dasperas in'economia che funcziunescha. Perquei sustegn l'organisaziun danovamein era la scolaziun.» In'empr pass leutier ha igl Agid da muntogna svizzer gia fatg. Culla Swisscom Broadcat ha el pagau la nova pagina d'internet dalla SFS cun sistem d'annunzia electronic pils cuors.

Schanza per interprendiders giuven

El rom da quella nova strategia sponsurescha igl Agid da muntogna svizzer era l'attracziun principala dalla SFS digl onn vegnent. Il project senumna «Seminari introductiv: economia da menaschi» e vegn plinavon purtaus dall'Uniun svizra d'antierius meinafatschentas Adlatus e dil promotur regional dall'economia Pieder Vincenz. Il seminari plidentia persunas che vulan u arver fatschenta ni han schiglioc in'idea per commercialisar in product. Abstrahau da quei vegn la SFS era a porscher uonn siu program da cuors tradiziunals e sco Martin Mathiuet di eis ei ton sco segir ch'ei detti era uonn in tschuat lavurs e cuors sin incumbensa per la SFS.



Marina Cahenzli e Martin Mathiuet cul program dalla Scuntrada e formaziun Surselva pigl onn vegnent.

FOTO S. BUNDI

LUMNEZIA

La via da Degen vegn serrada

(lq) Pervia da lavurs da cuvrada vegn la via da Degen serrada per scadin traffic naven da mesjamna, ils 6 da settember la damaun dallas 07.00 entochen gievgia, ils 7 da settember la sera allas 18.00. Quei pertucca il tschancun naven dalla via cantunala tochen giu Degen, kilometer 0.00 – 1,25. En cass da malaura vegnan las lavurs spustadas per in gi.

CORRIGENDA

La fiera ha liug la dumengia

(abc) Sil frontispezi ha LQ rapportau ier dall'emprema fiera da caschiel d'alp en Surselva. Quella ha denton buca liug sco scret el text la sonda, ils 23, mobein la dumengia, ils 24 da settember. Ins vegli perstgisar quei sbagl.

